

## PETEDON DADA UAID I

---

### Petedon tauamboen chiaid

**1** <sup>1</sup>Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidëns hun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. <sup>2</sup>Ëndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

### Esus tantiaquid Nuquin Papa yacno tabadte chiaid

<sup>3</sup>—Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. <sup>4</sup>Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. <sup>5</sup>Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec. <sup>6</sup>Ëmbi aden chuisho tantias mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquio iquendac. <sup>7</sup>Nuqui

cudasquid yec zatotsi quiash Nuquin Papa: —Padi. Chën. Esus tantiaquido natiamenda —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaïd tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: —ÏBëdambo icquidida neque? Isnu —quetanquin matsu tauiec. Adembidi: —ÏEsus tantiaquidquibida neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. Èbëdi tabadec cho —quequin utsibo tantiamequin chuishun abi yacno buanendac.

<sup>8</sup>Aden mimbi isacmaïdi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec. <sup>9</sup>—Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

#### **Esus chote tsusedpabon chiampid**

<sup>10</sup>Ëndenquimboshë Nuquin Papan tantiamiac isadaïdbo tsusedpabon Nuquin Papan chiaïd chuiquidon Esusën mates cuidmenquio icte dada uapampic. Esusën nate abitedi tantienquio icquin daëdpactsëc tantiaquin: —ÏMitsipadquid Nuquin Papan chomepeba?

—queded-quededquin chuipampic nuquin tsusedpabo isadaïdbon.

<sup>11</sup>Aïdobëd icquin Esuquidistun Mayanën tantiamiac Esus chote abentse-abentsen chuipampic. —Matesën chieshënquin cuesten dectanac mates cuidmenquio icnuec abided ciudadec unësendac. Adec unësaçsho uincuemiac padpidec abitedishun Içbo icoaïndac —quequin

Esus chote chuipampic. —ÏTsutsi chopec? ÏTedectsi yash chopec? —quequin abitedi tantiatiaquido icquimbi daëdpactsëc isadaïdbo tsusedpabon tantiapampic. <sup>12</sup>Naden Nuquin Papan tantiamepampic. —Mibi nibëdanan ëmbi chuiboed ëmbi matesmiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiaquido icquimbi abitedi tantienquio iquec.

#### **Bëdamboec tabadte tantiamiaïd**

<sup>13</sup>Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquio yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquio icquin. <sup>14</sup>Ambi: —Con mado nec. Con champi nec —caïdo icquin Nuquin Papan chiacpadomboen nanuna. Ënden Nuquin Papan chiaïd tantiabi mibi bunaid naic mibi icsanëdacpadec icsaïnda. <sup>15</sup>Mibi Esus tantiamequid icsaisambo Nuquin Papa neque. Ambi chiaïd niaquenquio yec bëdamboec tabadnuna. <sup>16</sup>Nuquin Papan ambi chiaïd naden dada uamepampic. “ ‘Nuquin Papa icsaisambo nec,’ quiaish icsaisa ictiadquio yec bëdamboec tabad,” quequin Nuquin Papan ambi chiaïd dada uamepampicpadec bëdamboec tabadnuna.

<sup>17</sup>Papa quequin nuqui chianeboed Nuquin Papa matesën naidtedi chuiquid nendac. —Nëïd ëbi tantiesa neque. Icsano nidmenu. Nëïd ëbi

tantiaquid neque. Ēbēdi tabadmenu —quequin matses abitedi chiendac. —Abēdi tabadmenquio icnushe —quiash Nuquin Papabēd icte bunec bēdamboec tabadnuna. <sup>18</sup>Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasēn yuaido icscho Nuquin Papan nuqui bēdamboen istiapimbo icpanēdash. Adshun Satanas nuqui bedshunuen ėpiucquidida Nuquin Papan menepanēdash? Padenquio. Adquid icsabudtequid menenquio icquin <sup>19</sup>aton Mado Esus icsaisambo icscho matsesmepanēdash. Aden matsesmiacsho chieshēmēnquidēn cuesten dectanac Esus aton intac chididiquec abided cuidadec unēspondash. Nēbi aton Mado Esus tantiaquido bēdamboen isquin Nuquin Papan Satanas bedshunec. Aden Nuquin Papan bedshunaid yec bēdamboec tabadnuna. <sup>20</sup>Ēndenquimboshē abitedi uabi Nuquin Papa nadpampic. —Ēmbi tantiacpadēn yuecash matsesash matses cuidmenquio icnuec mibided cuidadec unēsta, Mado —quepampic. Aden ambi chiampicpadomboen badedquio namenquio icboedēmbi nēbi nameshun Esus tantiasho mibi bēdamboen isec. <sup>21</sup>Abi tantiasho Esusēmbi Nuquin Papatsen nuqui tantiamec. Adoac nuqui naden tantiec. —Esus unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquio Nuquin Papa nec. Ēbi unēsacsho uincuemeshun abi yacno ēbi tabadmendac —quequin Nuquin Papatsen nuqui tantiec.

#### **Esus tantiaquido tantiananquiqote chiaid**

<sup>22</sup>Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec.

Adecbidi muenquio yec tantiananquionona. <sup>23</sup>Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac. <sup>24</sup>Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

<sup>25</sup>Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,”

quequin abimbo chuiampic. Aidēn chiaidquio mibi chiac caondash.

#### **Nuquin Papan chiaid iste bunquionona, quiaid**

**2** <sup>1</sup>Aden Nuquin Papan chiaid tantiash chieshēmēnec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. <sup>2</sup>Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiacbimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —queshun Nuquin Papan chiaid isbanuna. <sup>3</sup>—Esus tantiec bēdambo iquebi —queshun Nuquin Papan chiaid isbanuna.

**Buintadbimboecquid Esus nec, quiaid**

<sup>4</sup>Nuqui tantiaid nadquio iquec. Shubu uanun buintadquio nacinitsinuen istuidshun: —Nëid bēdambo iqueque. Nëidquio naimbi —quiacbimboen Nuquin Papan: —Ĕmbi tantiaidquio yec mibi bēdambo iqueque. Ĕmbi chiacpadomboen mibi namenu —capanēdash Esus. Adoaidi matses dadpeshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac.

<sup>5</sup>Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantieme, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic.

<sup>6</sup>Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nëidquio shubu uanun nitsinembi,’ quiacbimboen Edusaden yacno ěbi bēdamboen ismequidquio isadaidbobēd tabadmendambi.

Aid caic: ‘Nëid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ěbi yacno tabadmendambi,”

quequin Nuquin Papan ambi chiaid dada uamepampic. <sup>7</sup>Aid tantiec: —Bēdamboshē iquec —quependac Esus tantiaquido. Utsibombien Esus chieshēnec. Ĕndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nëidquio shubu uanun nitsinembi,’ quetiadquidi isuidacbimboen Nuquin Papan namiaid chieshēnac.

Aden buintad isuidaids utsin bedshun shubu uanun nitsinacbimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. <sup>8</sup>Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiacsho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacbimboec ěbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatiapimbo icquin Esustsen tantiatiapimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

**Nuquin Papan matses nuqui nec, quequin chiaid**

<sup>9</sup>Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaids nuqui Esus tantiamepondash paposhquiacbimboecnuc. Adoac: —Nuquin Papa bēdamboshē iquec. Ambi chiacpadomboenuidi natiadquio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin

Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. <sup>10</sup>Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

### **Bēdamboec tabadte chiaid**

<sup>11</sup>Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquio yamane —quiash bēdamboec tabadta. <sup>12</sup>Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

<sup>13</sup>Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. <sup>14</sup>Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. <sup>15</sup>Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin

icsamboen chuiboedombi ambi icsamboen chiaid ēntsiash.

<sup>16</sup>Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. <sup>17</sup>Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

### **Yuabo chiaid**

<sup>18</sup>Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi ademdbi nata. <sup>19</sup>Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. <sup>20</sup>Īcsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

### **Chieshtoenquio yec Esus unēsaid**

<sup>21</sup>—Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —qeshun Nuquin Papan nuqui Esus tantiaquid icmepondash. Esus

nadondash. Nuquin Papa nuqui cuidmenquo icnuec abided ciudadec mëyadec unëspondash. <sup>22</sup>Nuquin Papan dada uamepampicpadquo “muesambo yec icsaisambo icpondash.” <sup>23</sup>Adquid icscho abi chieshënquidon mamënshunaqui Esusën chushcainquo icpondash. Aidon matonbudnetanquin buanshun cuesten dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan matsesën naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquo icpondash. <sup>24</sup>Adash: —Ēbi tantiaquid ma icsaid ucudacimboec bēdamboec tabadnu —quiash nuqui icsaid bedshunec abided ciudadec unëspondash. Adec aton Madoded ciudadec unēsacsho isash nēish bēdanshun Nuquin Papan aton Mado tantiaquido bēdamboen isec. <sup>25</sup>Yuan icbo cuenēnacimboen Nuquin Icbo nuqui tantienquo icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —qeshun nuqui Esus tantieque. Bēdamboen nanuna.

#### Bēnēbēdta chido chiaid

**3** <sup>1,2</sup>Tantia, chidobo. Bēnēchoquid icscho mibi chuinu. Esus tantiaquid icquin min bēnēn chiapadomboen nata. —Esus tantiec ēbi bēdamboec tabadsho isun Nuquin Papan chiaid tantienquo icboedēmbi con bēnēn Esus tantiabentsiash. “Mimbitsen Esus tantiabenta,” quequin ěmbi chiambobi Esus tantiabentsiash —qeshun min bēnēn chiapadomboen nata. <sup>3</sup>Bēdamboec tabadquid ictiadquo icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo

isadec. Mibi bēdambo iquec,” mabi canu —quiash nacnemēdteuidi tantienda. <sup>4</sup>—Bēdambo mibi iquec —camenuec bēdamboec tabadta. Nēishēmēnenquo icquin bēdamboen nabanta. Chieshenquo icquin min bēnēn chiapadomboen naquid icta. Mibi adquo icscho isash: —Mibi bēdambo iquec —quendac Nuquin Papa. <sup>5</sup>Ēndenquimbo isadaidbo tsusedpan chido Nuquin Papa tantiaquid yec adquo icpampic. Aton bēnēn chiapadomboen naic bēdambo icpampic. <sup>6</sup>—Con bēnē con icbobimboec iquec —quequin aton bēnē Abadauan caidēn chiapadomboen Sada caidēn napampic. Esus tantiaquid icscho mamënshunaqui min bēnē dacuēdēnenquo icquin aidēn chiapadomboen naic bēdamboec tabadec Sadapadquo mibi ictsiac. Adquid bēdambo iquec. <sup>7</sup>Tantia. Bēnētsen chuinu. Abia uimabudquid icscho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbi chiaid Nuquin Papan tantienquo icnushe. Min chido bēdamboen ista.

#### Bēdamboec tabad, quequin chiaid

<sup>8</sup>Nēbi Esus tantiaquido abitedi chuinu. Tantia. —Nuquin Papan chiapadomboen nanuna —quiash bēdamboec isnanuna. Cuishonquequidbē cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquo icquin utsibon chiaidtsen nanuna. <sup>9</sup>Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Ēbi

chieshënquid bēdamboen isquin  
bēdamboen tabadme, Papa —quequin  
Nuquin Papa chianeta. —Ēmbi  
bēdamboen isaidon ma aton matses  
utsibo bēdamboen isnu —queshun  
Nuquin Papan nuqui Esus tantiaquido  
icmiaye. Bēdamboec tabadnuna. <sup>10</sup>Adec  
bēdamboec tabadte chuiquin Nuquin  
Papan dada uamepampic naden.

“Bēdamboec tabadte bunquidēn  
nadoendac.

Adonante bunenquio icquidēmbi  
utsibo muauainquio iquendac.  
Chieshënquin utsibo icsamboen  
chienquio iquendac.

<sup>11</sup>Icsamboec tabadboedi bēdamboec  
tabadendac. Utsibo  
chieshēnansho isash:

‘Padi. Chieshēnanenda,’ quendac.

<sup>12</sup>Adec bēdamboec tabadsho Nuquin  
Papan bēdamboen isendac.

Aden bēdamboen isaidon: ‘Ēmbi  
chuisho tantia. Ēbi bēdamboen  
ista, Papa,’ quequin abi chuisho  
Nuquin Papan tantiendac.

Icsamboec tabadshoen bēdamboen  
istiapimbo iquendac,”

quequin Nuquin Papan dada  
uamepampic.

**Cuesaquí dacuēdenda, quequin chiaid**

<sup>13</sup>¿Bēdamboec tabadshoda bēdambo  
icquidēn badedquio mibi cuespatsiash?  
Padenquio ictsias. <sup>14</sup>Bēdamboec  
tabadsho isun icsambo icquidēn  
cuesacsho mibi Nuquin Papan  
bēdamboen istsiash. Mibi  
chieshënquido dacuēdēnenda.

<sup>15</sup>Dacuēdēnenquio icquin: —Con Icho  
Esuquidistu nec —quequin ambi  
chiacpadomboen nanuna. Aden mimbi  
Esus tantianuc utsibo: —¿Atotsieshun  
Esus tantie? —quesho: —“Abided  
cuidadec unēsaid Esus tantiasho Nuquin  
Papan ēbi bēdamboen isquin unēsacsho

abi yacno ēbi tabadmendac,” qeshun  
Esus tantiembi —quequin Esus  
tantesabo chuibanuna. <sup>16</sup>Aden  
nēishēmēnenquio icquin Esusēn naid  
chuibanuna. Aden bēdamboen chuinuec  
Esus tantiaquiec bēdamboec tabadnuna.  
—Ēbi bēdamboec tabadsho isash ēbi  
chieshënquin muauaquid: “Bēdambo  
icquidi muauachitombi. Icsachitobi,”  
ma quenu —quiash bēdamboec  
tabadnuna. <sup>17</sup>—Ēbi tantiaquid utsibon  
chieshēnendac —quequin Nuquin Papan  
tantiacpadomboen Nuquin Papa  
tantiaquido utsi-utsien utsibon  
chieshēnendac. Bēdamboec tabadquid  
icsho utsibon chieshēnaqui nuqui  
chieshtoenquio icsho isash: —Mibi  
bēdambo iquec —quetsias Nuquin  
Papa nuqui caic. Icsambo icsho quēnēn  
nauedaidi nēishenquio icsho: —Mibi  
bēdambo iquec —cainquio ictsias  
Nuquin Papan.

**Esus unēsaid tantia, quiaid**

<sup>18</sup>Chieshēnaqui Esusbimboec  
chieshtoenquio yec bēdamboec  
tabadnuna. Aid icsaisambo yequi nuqui  
icsaid bedshunec abided cuidadec  
unēspondash. Aden Nuquin Papa abi  
tantiaquido bēdamboen ismenuec  
abentsecquiobi unēspondash padpidec  
unēsēnquio icnuec. Aton dada unēsambi  
aton tantiate unēsabi icpanēdash.

<sup>19</sup>Adec aton dada unēsambi aton  
tantiate icnuc ēndenquimboshē Noe  
caidēn matses abi tantesabo icsho  
Nuquin Papan cuidquin unēs uampido  
uidēn uashun quēnēn sauedampicno  
Esus nidpanēdash. Ambo nidshun  
Nuquin Papan cuidpampido Esusēn  
ambi naboed chuibampanēdash.

<sup>20</sup>Naden Nuquin Papan aido cuidquin  
unēs uapampic. Ēndenquimboshē aton  
matsesbēd tabadec Noe bēdambo icnubi  
aton matses icsamboshē icpampic.

Adnubien Nuquin Papan: —Matses icsaquido abitedi uesquin unës uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuiampic. Adoac badedquio cano dapa nacnemëdenquio yacpadembi Nuquin Papan badedi cuidenquio icpampic: —Ma abi icsaid ënshun ëbi tantianu —qeshun. Adnubien cano dapa nacnentanec Noe chedo Stedpactsëc cano dapa antabëdtopampic. Adnubien aido antabëdtoaid cano dapa acten bedtoac nuadtopampic. Utsiboen acte mabudadmiaidën mentoadbudnepampic. Noe abi tantiaquidquio icsho Nuquin Papan cuidenquio icpampic.

<sup>21</sup>Adembidi Esus tantiasho nuqui cuidenquio iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bëchish ucquinda nuqui adodi? Padenquio. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquio iquebi, Papa —quequin nuqui adoec. Aden abi tantiasho Nuquin Papan uincuemenëdaidën Esuquidistun nuqui cuidmenquio iquec. <sup>22</sup>Aidi uincuenash Nuquin Papa yacno nidash aidbëdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bëdabo bëdamboen namequimbic Satanäs aton yuabo mayan icsabobëdta Esusën cuidendac.

#### Bëdamboec tabadnuna, quiaid

**4** <sup>1</sup>Nuquin Papan tantiacpadomboen nasho utsibon chieshënquin mëyanaqui Esus chieshtoenuo icpondash. Adembidi chieshëmënuquidën

chieshënaqui adecbidi chieshtoenda. Abided cuidadec unësaid Esus tantiaquin nuqui icsaid nuqui ënendac. <sup>2</sup>Aden nuqui tantiacpadomboen nainquio icquin Nuquin Papan chiacpadomboen natiadquio nuqui iquendac. <sup>3</sup>Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: —Nëid papa canu —quequin matsesbimboecnuc nacnenquinc mimbi capondac. Adeç icsateuidi bunec mëmuntiapimbo mibi icpondac. Adquid iccondaiddi nëbi bëdamboec tabadta. <sup>4</sup>Adeç bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquio ique? Mimbi Nuquin Papa caid nibëdec —quequin mibi icsamboen chuiquin mibi mamënsnunendac. <sup>5</sup>Aden mibi mamënsnunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac. <sup>6</sup>Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabë tabadendac padpidec unësenquio yec.

#### Utsibo nashununa, quiaid

<sup>7</sup>Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chianesho Nuquin Papan bëdamboen

tantianu —quiash adta.

<sup>8</sup>—Tantiananquido chieshënanec cuidnante bunenquio iquec —quiash ënëdenquio yec tantiananquionona.

<sup>9</sup>Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquio icquin min shubun yued.

<sup>10</sup>Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquio icmenuen chieshenquio icquin nanuna.

<sup>11</sup>¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquio icquin.

#### **Chieshënaqui chieshtoenquio icte chiaid**

<sup>12</sup>Ëmbi tantiaido mibi neque. Tanta. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquio chieshëmpayoc.

<sup>13</sup>—Chieshënquín Esuquidistu comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. <sup>14</sup>—Esuquidistu tantiaquid nec —queshun chieshëmënnquidon natiamiaid mibi bëdambo iquendac. Nuquin Papan

Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. <sup>15</sup>Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënnquín icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. <sup>16</sup>Esus tantiaquid icsho utsibon chieshënac dacuëdenda. Adec dacuëdenquio icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquio icquin Esus tantianuna. <sup>17</sup>—Nuquin Papan cuidte ushë nëbi icnuc ambi con matses caido Esus tantiaquido chieshëmënnquidon natiamendac —quiacpaden nëbi tauaquin mibi natiamec. Adsho isun: —Chieshëmënnquidën chieshënac ëmbi tantiacpadomboen abi icsaid ëntsiasch —queshun Nuquin Papan: —Natiamenda —cainquio iquec. Aden abi tantiaquido icsaid ëmete bunquin nashun ¿bëdiactsëcta abi tantiesabo cuidpec? <sup>18</sup>Naden chuiquin Nuquin Papan dada uamepampic. “Aden chieshëndeniach natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. <sup>19</sup>Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

#### **Esus tantiaquido chuibanquid Petedon chiaid**

**5** <sup>1</sup>Tantia. Esus tantiaquido chuibanquido icsho mibi chuinu. Mibipadquid Esus tantiaquido

chuiبانquid nebi. Paëmboshë icmequin  
 Esuquidistu unës uasho isondambi.  
 Aidën padpidec nidaidën choshon abi  
 yacno buanuen nuqui beduaneque.  
 Tantia. <sup>2</sup>Icho yua cudasacimboc  
 mibëd icquido Esus tantiaquido cudasta.  
 —Esus tantienquo yanushë —queshun:  
 —Nuquin Papan chiaid niaquenquo yec  
 bëdamboec tabad —quequin chuibanta.  
 —Esus tantiaquido chuibanquid icta  
 —cac: —“Padi,” quetiadquo icquimbi  
 naimbi —quenquo icquin: —Aden Esus  
 tantiaquido nashumbantsiambi —quec  
 Esus tantiaquido chuibanquidquo icta.  
 —Piucquid dadpen bednun nanu  
 —quenquo icquin Nuquin Papan  
 chiapadomboen natiadquo yec Esus  
 tantiaquido chuibanquid icta.  
<sup>3</sup>—Nëidtedi Esus tantiaquido  
 bëdamboen name —caidtedi  
 bëdamboen isequi chushcanenda.  
 Adenquo yec: —Ëbi yacpadec ma  
 tabadnu —quec bëdamboec tabad.  
<sup>4</sup>Aden Esus tantiaquido chuibanquidën  
 bëdamboen namesho isun Nuquin Icbon  
 nidaidën padpidec choshon utsibo  
 ismequin: —Nëid bëdambo icquid nec  
 —queshun chuibanquid ambi  
 namiaidobëdta abi yacno buanendac.

#### **Esus tantiaquidon nate utsi chiaid**

<sup>5</sup>Tantia, caniabö. Mibitsen chuinu.  
 Mibi chuiquid dapabon chiaid  
 niaquenquo icquin aidën  
 chiapadomboen nata. Aidtedsëqui  
 caniabö chuishumbic mibi  
 yacnocquidotedi chuinu. —Ëbiuidtsëqui  
 bëdambo iquebi. Ëmbimbo naiduidi  
 naimbi —quenquo icquin utsin  
 nacpadomboentsen nata. Aden chuiquin  
 Nuquin Papan ambi chiaid naden dada  
 uamepampic.

“Nuquin Papa tantienquo icquin  
 aton matses utsibo tantienquo  
 icquin ambi naiduidtsëqui nasho:

‘Adquid icsambo iquec,’ catsiash  
 Nuquin Papan.

Utsimbien Nuquin Papa tantiaquin  
 utsibon naidtsen nasho Nuquin  
 Papan bëdamboen isquin  
 bëdambo icmec,”

quequin Nuquin Papan ambi chiaid  
 dada uamepampic. <sup>6</sup>Aden Nuquin  
 Papan chiapadomboen nabanuna.  
 Nadatiambo icquid yec abitedishun  
 Icbombo Nuquin Papa neque. Utsibon  
 chieshënaqui chieshtoenquo icnuna.  
 Adec chieshtoenquo icscho ambi  
 tantiacpadën utsibo ismequin: —Ëbi  
 tantiaquidquo mibi neque. Ëbëdi  
 tabadec cho —nuqui caindac Nuquin  
 Papan. <sup>7</sup>Aidën nuqui tantieque.  
 —¿Atotsimbi pepeba? ¿Ëbida cuespeba?  
 ¿Con matsesta unëspeba? —quequin  
 nuqui dacuëdaidtedi Nuquin Papa  
 chuinuna.

<sup>8</sup>Nuqui icsate bunacpadec icsainquo  
 icquin Esusuidi tantianuna. Esus  
 tantiaquido icscho Satanasën nuqui  
 chieshënuquec. Esus bedshunuen nuqui  
 icsametiadquo icquin bëdin nëish  
 nibënacimboc ambi icsametequid  
 Satanasën ënenquo icquin  
 nibëmbeneque. <sup>9</sup>Ista. Icsamenda.  
 Chieshtomenda. —Satanasën  
 icsamechitoshe —queshun Nuquin  
 Papan chiaid niac-niaquenquo icquin  
 Esus tantiaquionona. —Ëbi  
 chieshënacpadomboen Esus tantiaquid  
 utsibo nidaid utsi-utsiec yacno  
 tabadquido utsibon chieshënac caosh  
 —queshun chieshtoenquo icquin Esus  
 tantianuna. <sup>10</sup>Aden utsibon  
 chieshënaido yec yuec-yuecpactsëc  
 nuqui tabadec. Adshobien abi yacno  
 buanquin nuqui bëdambo icmequidën  
 Nuquin Papan Satanas nuqui icsa  
 uamenquo iquendac. Adembidi Nuquin  
 Papan nuqui bëdamboen isquid icquin  
 dayacquio yacbimboecnuc

chieshtoenquoio icquid nuqui icmendac.

<sup>11</sup>Ëmbi aden chuisho tantiashun: —Mibi bédamboshë iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquoio icquin.

**Petedon ënquimbi chiaid.**

<sup>12</sup>Esus tantiaquidquoio Sidas caid nēidtedtsëqui ëmbi dada uaboed mibi yacno buamembi. —Esusquoio isondambi. Aid tantiasho Nuquin Papan matses bédamboen isbenendac —quequin abimbo mibi chiombique.

Chieshtoenquoio icquin Esus tantianuna.

<sup>13</sup>Nuquin Papan tantiamiac nuquibédtan Esus tantiaquido ëmbi Babidonia caid yacnocquidon: —Aido unësquoio iquec —mibi caosh. Babidonia caidbidi Doma caic. Con madobimboecquid Madcosën —Aido unësquoio iquec —mibi caosh.

<sup>14</sup>—Ëbédtan Esus tantiaquido nec —quiash: —Mibi unësquoio iquec —cananuna. —Ma Nuquin Papan mibi Esus tantiaquidotedi bédambo icmepanu —quequin Nuquin Papa chianembi. Padi. Aidedi chuiquin dada uaombi.